

Notat

Dato: 22.11.2019

Saksnr: 2019/141-1

Saksbehandlar: Kathrin Jakobsen

Til:	Hovudutval for næring, naturressursar og innovasjon
Frå:	Påtroppande direktør for innovasjon og næringsutvikling

Cruisestrategi for Vestlandet som case for søknad til Horisont 2020 / Horisont Europa

Bakgrunn

Horisont 2020 er EU sitt program for forskning og innovasjon. Budsjettet er på heile € 80 millionar og Europakommisjonen foreslår å auke budsjettet for neste rammeprogram frå 2021, Horisont Europa, til € 100 millionar. Hordaland fylkeskommune har jobba dei siste åra for å auke interesse og deltaking i Horisont 2020 blant regionale aktørar og har også søkt som partner i fleire prosjekt saman med lokale forskingsinstitusjonar eller aktørar.

Forskringsrådet og EU-nettverket FINN EU planlegg ei ny mentorordning for kommunar og fylkeskommunar som ynskjer å søkje Horisont 2020/Horisont Europa. Målet er å gi aktørane skreddarsydd og gratis hjelp. Tilbodet vil vere for kommunar og fylkeskommunar (og eventuelt kommunale føretak og interkommunale selskap) som er særskilt motiverte for å søkje Horisont 2020 eller Horisont Europa. Hordaland fylkeskommune og Sogn og Fjordane fylkeskommune ynskjer å delta i denne mentorordninga, som Vestland fylke, med Cruisestrategien for Vestlandet som case. Frist for å søkje er 1. desember.

Vestland fylkeskommune har planar om å ha ei meir strategisk tilnærming til dette arbeidet. Tilbodet om å søkje mentorordninga vil difor vere eit godt høve til å bygge programkompetanse og få rettleiing innafør prosjektutvikling på tema som er relevante for Vestland fylkeskommune og Vestlandet.

Krav om ei konkret utfordring – eit «case»

For at ein skal kunne delta i mentorordninga, er det eit krav at ein har skriftleg forankring både administrativt og politisk med avsett ressursar og at ein har ei konkret utfordring der ein skal utvikle nye løysingar gjennom eit såkalt trippel helix samarbeid. Ein skal ha utarbeida ein eller fleire strategiske planar og/eller handlingsplanar for arbeid med utfordringa. Ein skal også ha ein uttalt ambisjon om internasjonalt samarbeid og eit klart ønske om eit H2020-prosjekt.

Vestlandsrådet har sidan 2015 hatt eigarskap til dei fire vestlandsfylka sitt felles arbeid med ein cruisestrategi for Vestlandet, handlingsplanen til strategien, og arbeidet med iverksettinga av tiltaka i handlingsplanen. Denne saka er difor på dagsorden på møtet i Vestlandsrådet i november for å informere om mentorordninga og for å fortelje at Vestland fylke ynskjer å delta med cruisestrategien som tema. Ein god forankring i heile Vestlandet er viktig under dette temaet.

Kvifor cruise som tema i ei mentorordning?

God handsaming av effekten av cruisetrafikk til destinasjonar på Vestlandet, og mulighetene som ligg i ei betre utnytting av den positive verdiskapinga på land, er eit godt døme på eit omfattande arbeid med mange fasettar på tvers av FN sine tre søyler for berekraft. Det er behov for tett samarbeid med FoU-miljøa for å nå måla som er satt i strategi og handlingsplan, også vist gjennom forskingsprosjektet «Sustainable Cruise», som fylkeskommunane har samarbeida om. Problemstillingane knytt til miljø og klima er felles for alle hamner og destinasjonar, og det er naturleg å sjå til internasjonale miljø når det gjeld framtidige løysingar for drivstoff, handtering av logistikk på land, utslepp til luft og sjø og innhenting av kunnskap.

Kvifor delta i mentorordninga:

Deltakarane skal få oversikt over eksisterande og kommande Horisont-tema som kan vere relevante for politisk vedtekne strategiar og handlingplanar i fylkeskommunen. Føremålet er at deltakarane skal få nok kunnskap om prosjektutvikling og søknadsskriving til å kunne delta som partner i ein søknad til Horisont 2020 eller Horisont Europa innan to år. Ein skal få innsikt i Forskingsrådet sine stønadsordningar knytt til det å bygge nettverk, og å utvikle gode prosjekt og skrive gode søknader. Det skal opprettast kontakt med relevante nasjonale og europeiske partar knytt til prosjektideen. Vestland fylke vil derfor opparbeide seg betre kompetanse for å finne gode løysingar for Internasjonalt samarbeid knytt til cruisetrafikk, og andre eigna tema.

Økonomi

Mentorordninga er eit skreddarsydd opplegg i form av ein serie med workshops over 18-24 månader. Ordninga gir gratis støtte og rettleiinga frå ekspertar i Forskingsrådet gjennom eit tilrettelagt program, og tilfører kompetanse til avdelinga. Det er krav at organisasjonen som søker sett av øyremerka ressursar, og at medarbeidarar deltek på heile workshopserien på vegne av organisasjonen. To medarbeidarar frå Avdeling for innovasjon og næringsutvikling vil delta i ordninga, ein medarbeidar som er fagperson innanfor reiseliv og turisme, og ein medarbeidar som er fagperson innanfor EU-program og prosjekt under tema innovasjon. Forskingsrådet opplyser at det er også mogleg å søkje prosjektutviklingsstønad (PES midlar) som mellom anna kan dekke reiseutgifter for medarbeidarane.